

四庫全書

集部

欽定四庫全書

集部

臨川文集卷

五十八至
六十

詳校官庶吉士臣龍廷槐

檢討臣何思鈞覆勘

覆校官中書臣呂雲棟

校對官主簿臣汪日贊

謄錄監生臣張炳

欽定四庫全書

臨川文集卷五十八

宋 王安石 撰

表

封舒國公謝表

除依前左僕射觀文殿大學士集禧觀使謝表

朱熹傳聖旨令視府事謝表

差弟安上傳旨令授勅命不須辭免謝表

孫珪傳宣許罷節鉞謝表

封荊國公謝表

賀貴妃進位表

賀生皇子表六道

賀魏國大長公主禮成表

賀冀國大長公主出降表

賀魯國大長公主出降表

賀康復表

賀南郊禮畢肆赦表二道

賀明堂禮畢肆赦表

封舒國公謝表

臣某言伏奉制命特授開府儀同三司封舒國公者發
號端門外覃慶賜疏恩列辟俯逮空飡舞手均歡捫心
獨幸

中謝

伏念臣久孤眷遇當即譴訶曠歲籲天尚辭

榮而未獲新恩賜國仍席寵以有加唯茲邦土之名乃
昔宦遊之壤久陶聖化非復魯僖之所懲積習仁風乃
嘗朱邑之見愛鴻私所被朽質更榮此蓋皇帝陛下道

冒群才彌天之所覆恩涵庶品并物之所包以釐事備
於郊宮而惠澤均於海宇故雖幽屏弗以遐遺顧冒昧
之不貲豈靡捐之可報臣無任

除依前左僕射觀文殿大學士集禧觀使謝
表

臣某言伏奉制命除授依前行尚書左僕射充觀文殿
大學士集禧觀使者屢躋天威坐彌年所曲從危懇仰
荷至慈

中謝

伏念臣學止求心行多違俗少隨官牒徒

有志於養親晚誤聖知欲忘身而許國疲曳久瘵於宰
事閔凶適在於私門中解繁機特上煩於矜惻外分憂
寄復難強於支持方累鴻私更尸殊寵既兢慙於非據
輒冒昧以終辭伏蒙陛下示以優容屢垂訓獎赦其逋
慢終賜矜全猶加祕殿之隆名俯慰窮閭之哀疾地崇
祿厚尚非空食之所宜歲晚力愆雖欲捐軀而曷報臣
無任

朱矢傳聖旨令視府事謝表

臣某言三月二日提舉江南路太常丞朱炎傳聖旨令
臣便視府事者使指遼臻訓詞俯逮敢圖哀疾尚誤眷
存中謝伏念臣曲荷搜揚久孤付屬有能必獻未嘗擇
事而辭難無力可陳乃始籲天而求佚然方焦思有為
之日以此懷恩未報之身苟營燕安豈免慙悸伏蒙陛
下仁惟求舊義不忘遐乃因乘輅將命之臣更喻推轂
授方之意踦履無用誠弗忍於弃捐朽株匪材尚奚勝
於罷使永惟獎勵徒誓縻捐臣無任

差弟安上傳旨令授勅命不須辭免謝表

臣某言伏蒙聖恩差弟安上提點江南東路刑獄以臣
衰疾就令照管仍傳聖旨令臣便授勅命更不須辭免
者江海衰殘雲天悠遠恩言狎至感涕交流

中謝

伏念

臣積荷知憐初無報稱豈圖賤質上簡聖心數遣中人
間因外使喻以眷懷之至意慰其憂苦之餘生惠焉既
久而彌加告矣雖頑而未捨乃至召見同產馳賜十行
之書使營私門就捐一路之寄訪逮纖悉矜及隱微追

千載之遭逢殆無前比顧百身之糜殞安可仰酬唯當
祇聖訓之鴻私豈敢固愚衷之小諒重念無傷於國體
乃為不負於天慈欲以里居之安而尸官廩之厚固已
犯明義而累食功之實況復干隆名而長昧利之風至
於詞窮雖兢慙於屢黜可以理奪終冀幸於矜從臣無
任

孫珪傳宣許罷節鉞謝表

臣某言二月二十二日江東轉運使孫珪到府伏奉聖

慈宣諭以臣誠請甚確志不可奪故罷節鉞春時更宜
慎愛者囊封屢黷特荷矜從使傳載馳重煩慰撫

中謝

伏念臣久尸名寵莫報恩私既逃不職之誅更竊無功
之祿閉門養疾曾未慙於朝榮擊壤歌時顧難忘於聖
力伏蒙皇帝陛下義惟求舊仁不棄遐故雖簪屨之遺
尚蒙簡記曾是筋骸之束敢愛縻捐臣無任

封荊國公謝表

臣某言伏奉勅命授臣特進荊國公加食邑四百戶食

實封一百戶勲如故者宮庭嘉享推惠術以及人田里

空餐溫宸恩而累國

中謝

伏念臣苦窳賤質卷曲散材

遭值休辰登備貴器有未償之厚責無可錄之微勞敢

冀瘝身尚叨徽數此蓋皇帝陛下備成熙事答四表之
歡心董正治官建一代之明制因令疲苴與被光榮雖
自誓於糜捐顧何酬於賁博臣無任

賀貴妃進位表

祿盛之禮發於宮闈驩康之聲播於寰海

中賀

恭惟皇

帝陛下放古之憲刑家以身乃資婦德之良俾貳坤儀
之政蓋關雎之求淑女以無險詖私謂之心鷄鳴之得
賢妃則有警戒相成之道於以求助不專為恩臣生逢
明時竊觀盛事祝聖人之多子輒慕堯封思令德以式
歌豈慙周雅臣無任

賀生皇子表六道

臣某言都進奏院狀報誕生皇子者宮闈嗣慶寰海交
欣凡遇戴天惟均擊壤

中賀

臣聞螽斯之言衆子是為

王者之時華封之祝多男亦曰聖人之事恭惟皇帝陛下紹祖休顯憲天昭明致文武之憂勤成堯舜之仁孝宅師無競堯箴之寢既安傳類有祥弓韜之祠屢應詒謀方永錫美用光臣託備蕃維叨承睿獎不顯亦世家實與於榮懷於萬斯年心敢忘於慶賴臣無任

二

臣某言伏覩都進奏院狀報誕生皇子者嘉慶係傳歡欣摠集中賀臣歷觀古昔誕受福祥厥配天所以久長乃

有子至於千億伏惟皇帝陛下鳬鷺之雅媚于神祇芣
苢之風燕及黎庶弓韞嗣燕謀之報旒旒仍噩夢之祥
無疆惟休永保桑苞之固有室大競方觀椒實之蕃臣
嘗汙近司久尸榮祿特荷殊憐之至豈勝竊喜之情臣
無任

三

臣某言伏覩都進奏院狀報誕生皇子者皇運邇隆天
枝彌茂照臨所暨鼓舞攸均

中賀

臣聞史紀文慶之延

宜惟十子詩歌似徽之繼爰至百男肇敏于修乃繁厥
祉恭惟皇帝陛下道冒區宇德冠往初品庶蒙休既饗
和平之樂神靈錫美果膺蕃衍之祥臣嘗汙近司備叨
殊獎以宿疴而自困欲旅進以無階臣無任

四

臣某言伏覩都進奏院狀報七月四日誕生皇子者慶
兆六宮欣交九服照臨所暨鼓舞惟均中賀竊以堯寢
告祥實帝臨之釐事牢祠錫美乃神保於昌時伏惟皇

帝陛下追放堯勲嗣承犧象鴻名敷播已協九皇之高
純嘏垂延方覃千子之衆維祺有俶俾熾無疆臣夙冒
恩憐久尸榮祿適此驩嘉之會茆然趨造之難臣無任

五

臣某言伏覩都進奏院狀報誕生皇子者元精孚佑聖
種挺生慶係集於宮庭歡外交於寰宇

中賀

竊以熊羆

見夢種稊獻祥厥撫會昌之期乃膺錫羨之福恭惟皇
帝陛下德高振古仁浹含生故神明之肖浸蕃而福履

之將未艾臣久尸多祿特荷異恩顧哀疚之滋多望清光而獨遠臣無任

六

臣某言伏覩都進奏院狀報誕生皇子者燕禔饗德方儲錫羨之祥羆夢生賢克協會昌之運與在照臨之廣敷同慶賴之深切以思齊神罔時恫假樂民之攸暨天所保佑厥惟太姒之多男國之榮懷亦曰成王之衆子恭惟皇帝陛下令德光乎洛誦康功茂乎岐昌鴻休無

疆景命有僕蓋芟管之薄言采采衆皆先成則螽斯之
宜爾振振宗強孰禦臣久叨眷遇適阻進趨親值本支
百世之盛時敢忘壽考萬年之善祝

賀魏國大長公主禮成表

并周德
妃進封

臣某言伏以明告治庭寵頒恩冊家邦之慶海宇以欣

中賀

恭惟皇帝陛下荷天闕休若古丕式自禰率而尊

祖備極靈承謂姊親而先姑特加徽數改錫厥壤增褒
所生大號已孚庶言惟允臣久尸榮祿竊睹盛儀臚傳

雖異於九賓率舞尚同於百獸臣無任

賀冀國大長公主出降表

慶事備成恩紀隆洽有榮夷夏之觀厥孚邦國之休

中

謝

蓋聞勿恤於有家以祉而歸吉禮儀卒獲風化所原

不有在躬之清明其能由內而成熾恭惟皇帝陛下道光覆照教始親成篤念祖之至情致先姑之美義庶言無間徽典有加臣叨昧殊憐衰瘵遠屏親值榮懷之日用忘呼舞之勞臣無任

賀魯國大長公主出降表

臣某言伏覩進奏院報魯國大長公主出降者占蛇聘
夢祥實發於先朝奠鴈告期禮甫成於外館

中賀臣聞

親成經五禮之始睦嫺貫六行之中善與物昌慶惟時
賴恭惟皇帝陛下齊家而國治睦族而民雍恩隆天屬
之尊禮重王姬之降慎所選尚燕及文母之慈厚於送
歸追成穆考之孝臣叨陪興運獲覩盛儀雖句臚中絕
於九賓然呼舞外均於百獸臣無任

賀康復表

臣某言天佑俊德永錫康寧三靈一心所共欣慶

中賀

竊以執契踐運寶命在躬無疆惟休何恙不已伏惟皇
帝陛下堯仁舜孝充假彰聞惠于神民循道不越雖勤
勞庶慎衛養小愆而福履綏將旋日底豫平格獲祐效
驗甚明而臣衰疾所嬰久違宸宇聞傳踴躍倍百群黎
臣無任

賀南郊禮畢肆赦表二道

臣某言伏覩十一月二十五日南郊禮畢大赦天下者

精意上昭神靈底豫茂恩旁暢夷夏綏和

中賀

臣聞道

以饗帝為難禮以配天為至有秩斯祐唯四表之歡心

胡臭亶時匪九州之美味自古在昔若聖與仁厥遭昌

辰乃覩熙事恭惟皇帝陛下邁種三德敷奏九功率籲

奉璋之衆髦聲稱奠璧之新禮廟邁致孝郊血告幽誠

既格於穹旻福遂均於品庶振憂矜寡原宥肯哉第五

玉以褒封善人是富發三錢而慶賜賤者不虛天其居

歌人以呼舞臣夙叨寵獎親值休成雖無與於駿奔實
不勝於竊抃臣無任

二

臣某言伏覩今月初五日南郊禮畢大赦天下者精明
條達神睠顧而依懷膏澤川流人歡呼而蹈厲

中賀

臣

聞語孝之至莫大於配天議禮而輕不足以享帝能舉
釐事實歸聖時恭惟皇帝陛下鴻化已昭康年屢應奔
走遵豆有董正之治官潔豐烝盛有底慎之財賦禮成

穀旦恩浹區雖洛誦之休明尚難譬稱豈兒寬之淺
吶能盡揄揚臣夙荷慈憐方嬰衰瘵望九賓之紳笏獨
遠句傳狎百獸於山林猶知率舞臣無任

賀明堂禮畢肆赦表

臣某言伏覩今月二十二日明堂禮畢大赦天下者蒐
講上儀神天底豫敷施大號夷夏交欣

中賀

蓋聞聖以

享帝為難孝以嚴父為至周右烈考或委政而弗專漢
記諸神或竊禮而無實恭惟皇帝陛下道包衆甫運會

不平巍巍成功堯之所謂大業業致孝舜之所由昌胤
選休辰肇稱嘉饗百禮既至而正惟已獨萬壽攸酢而
福與衆均臣久冒眷憐方嬰疾疾奉承籩豆乃獨後於
臣工蹒跚舞笙鏞竊自同於鳥獸臣無任

欽定四庫全書

臨川文集卷五十九

宋 王安石 撰

表

賀冬表八道

賀正表五道

辭免南郊陪位表

辭免明堂陪位表

詔免南郊陪位謝表

詔免明堂陪位謝表

加食邑謝表二道

賜生日禮物謝表五道

給蔡卞假傳宣撫問謝表

傳宣撫問并賜湯藥謝表七道

賜衣服銀絹等謝表

中使宣醫謝表

差張諤醫男霄謝表

賜厯日謝表二道

賀冬表八道

臣某言伏以庶彙潛萌上儀亞歲室告氣行之協臺占
瑞至之嘉恭惟皇帝陛下考敦復以大中顓朋來之衆
俊剛健之德與陽皆亨壽昌之期如日方永臣叨榮近
列櫻疾殊方鳬趨獨後於在庭爵躍實深於存闕臣無
任

二

臣某言伏以寶厯無疆嘉時有俶物潛萌而赤色氣順

動於黃宮

中賀

恭惟皇帝陛下道協乾行德孚陽感體

一元而獨復毓萬寶以皆昌永御丕平備膺純嘏臣寔
嬰衰疾久隔清光迹雖屏於丘園志不忘於宸宇臣無
任

三

臣某言伏以萬寶潛萌應黃宮之協氣百工胥慶亞正

歲之上儀

中賀

恭惟皇帝陛下體御至神詡揚獨智武

烈丕承乎前載堯明光被乎多方茂對斯時備膺諸福
臣比緣哀疾獨遠清光雖存闕之不忘尚造庭之未獲
臣無任

四

臣某言伏以氣復黃宮茂對物滋之始晷移北陸寅賓
日至之長

中賀

恭惟皇帝陛下道與時行化猶天運嗣

無疆而履位建有極以宜民甫臨陽長之期大襲福綏
之慶臣恩容居里病阻造庭雖薦壽以無階顧馳心而

曷已臣無任

五

臣某言伏以陰偕物極陽與朋來推厯玩占乃見潛萌
之信體元御辨以知敦復之中

中賀

恭惟皇帝陛下舜

孝禹功文謨武烈茂對時之福嘏靈承旅以壽康臣久
冒朝榮外叨方任弗與稱觴之末豈勝存闕之深臣無
任

六

臣某言伏以候始三微氣萌萬景謹觀臺之占瑞亞獻

歲以陳儀

中賀

恭惟皇帝陛下祗適燕謀靈承休運先

一陽而獨復歛諸福以朋來臣屬此養痾芥然在遠傾
心舜日欣寶景之踐長仰首堯天祝壽祺而等久臣無
任

七

臣某言伏以運與陽升晷偕日至儀亞三朝之會氣先
五刻之占

中賀

恭惟皇帝陛下茂對斯時備膺諸福御

至和之玉燭撫大順於璿璣臣竊望清光獨嬰哀疾徒
有懷於率舞乃弗預於稱觴臣無任

八

臣某言伏以一陽氣復萬寶萌生天效五雲之祥律應
三統之首茲為大慶允屬熙朝

中賀

恭惟皇帝陛下道

泰犧軒德深堯禹文物聲明之昭爛神祇祖考之安寧
適丁至治之期矧及履長之序萬靈隤祉四海交歡而
臣身處江湖地遥宸極瞻天日之表阻獻於壽觴望雲

龍之庭徒傾於驩頌臣無任

賀正表五道

臣某言伏以漢儀高會方登四海之圖周歷俯頒乃憲
百官之象

中賀

恭惟皇帝陛下含德淵懿撫辰休嘉乘

姑射之雲龍所更者化存胥敷於蓬艾各遂其生運與
日升道侔乾始臣尚依松社獨隔楓宸緬瞻朝著之班
竊慕封人之祝臣無任

二

獻歲初吉端月始和萬寶取新之元九儀告慶之會

中

賀

恭惟皇帝陛下體神蹈智抱一建中允迪謩勲永膺

孚祐德日新而有俶福時萬以無疆臣特荷寵光久嬰
哀疾雲天在望惟緬想於句傳麋鹿與遊豈暫忘於率
舞臣無任

三

寶曆無疆嘉生有俶厥初獻歲之吉乃始端月之和

中

賀
恭惟皇帝陛下常德日新景福時萬體泰元而難老

閱衆甫以皆昌臣久負異恩尚嬰哀疾瞻雲紛郁想朝
路以載欣愒日舒長與疇人而胥樂臣無任

四

寶懋無疆嘉生有俶門憲始和之象庭充元會之儀

中賀

伏惟皇帝陛下膺保永圖綏將純嘏撫五辰而致順毓
萬物以皆昌臣久負異恩尚嬰哀疾瞻雲煥爛欣逢舜
旦之華擊壤消搖樂得夏時之正臣無任

五

馭正夏時更端周厯體一元而敷惠適與春浮斂諸福
以代新方俾川至中賀恭惟皇帝陛下誕昭明德祗燕
孫謀齊七政以當天順五辰而凝績用求協氣以阜嘉
生閱千古之上儀肆三朝之盛會仰同星拱竦百辟以
在庭追效嵩呼極萬年而薦壽臣桑榆晚景麋鹿並遊
進莫與於臚傳退但知於率舞臣無任

辭免南郊陪位表

伏奉詔書令發來赴闕南郊陪位者萬國駿奔焯上儀

之殊觀一夫幽屏叨明命之特招

中謝

伏念臣竊祿已

多冒恩宥渥自致惓惓之義實有素情再瞻穆穆之容
豈非榮願而然暮景櫻以沉痾伏臥畝以負茲於今
未已侍壇垓而踐豆用此為妨臣無任

辭免明堂陪位表

臣某言伏奉詔書令發來赴闕明堂陪位者合宮丕享
寰宇駿奔冒被優詔之加使陪顯相之末

中謝

伏念臣

投身荒遠上負眷憐企踵禁嚴久勞監寐况宗祈之盛

禮辱號召之明恩當即辦嚴豈容辭疾而沉冥浸劇
勉實難心若子年雖每存於魏闕身如揚僕乃自外於
漢關臣無任

詔免南郊陪位謝表

臣某言近具表為疾病乞免赴闕南郊陪位伏蒙聖慈
特賜詔書許免者螻蟻惓惓上千旒宸雲天顥顥下賁
丘園中謝臣憊矣微生頽然暮齒冒恩鼎食非堅卧以
為高承命旌招宜駿奔而反後顧緣哀疾致隔清光伏

蒙皇帝陛下特赦尤違曲垂念聽鄙昏難望尚延舜日
之華荒翳易遺更獲堯雲之潤臣無任

詔免明堂陪位謝表

臣某言近具表為疾病乞免赴闕明堂陪位伏蒙聖慈
特賜臣詔書許免者駿奔弗獲內懷逋慢之誅寵荅曰
俞上荷眷憐之至

中謝

伏念臣久違祕近遂迫哀殘長

負異恩固難逃於幽黜敢圖釐事乃復與於詳延輒冒
布陳重煩矜允鴻私所被藏一札以知榮旅力已憊殞

百身而何及臣無任

加食邑謝表二道

臣某言伏奉詔命加食邑四百戶實封一百戶者顯相

郊宮固宜寵獎曠居田里乃濫褒嘉

中謝

伏念臣尚負

宿疴久尸榮祿無可論之薄效有未報之隆恩方國明

裡庶工祇載奉璋執豆旅幣獻琛具輸奔走之勞獨抱

滯留之歎豈圖疎逖亦冒龍光此蓋皇帝陛下荷休駿

虎斂福敷錫故雖幽屏弗以遐遺身每被於慈憐心敢

勞於勤策臣無任

二

解澤菊流明綸俯被永惟叨昧深以兢榮

中謝

竊以時

郊丘之承所以尊上帝疇官邑之賜所以富善人盛福
靡專至恩惟稱臣久塵要近上累昭明方玉輅之親祠
以銅符而外守運均休慶例獲褒嘉此蓋伏遇皇帝陛
下以平施於萬方無遐遺之一物矧蒙圖任之舊特荷
獎知之深祗服訓辭敢忘報禮臣無任

賜生日禮物謝表五道

璽書加獎臺餽示優屈使者之光華發里門之榮耀

中

謝

竊念臣才非秀穎勢又羈單方少也臣父教臣以爲
已之方及長也臣母勉臣以許國之節叨踰至此稱效
缺然慈訓久孤每感劬勞之日恩頒荐至更慙明盛之
朝此蓋伏遇皇帝陛下智臨方來慈保臣庶嘉以物多
而備禮使知意厚而盡心敢不自竭斷斷之能庶以少
申惓惓之義臣無任

二

慰藉溢言匪頒異數荷恩勤之及此思報稱以茫然中

謝伏念臣謬簡神心叨陪大政以久孤之樸學當難遇之盛時雖釐愚忠何裨聖治門弧可想方永念於劬勞臺餽有加更上煩於寵獎此蓋伏遇皇帝陛下施仁品物致禮臣鄰將備責於安危故俯同於憂樂所願輸勞而後食敢知得賜之為榮矧生已之至恩已云不報獨事君之大義庶或無慙臣無任

三

臣某言伏蒙聖慈以臣生日特降詔書賜臣羊酒米麴
者書名閭史適在斯辰拜使家庭猥叨異數

中謝

伏念

臣才非經國幸實遭時徒塵宰席之延初乏辰猶之告
敢圖恩獎俯運燕私此蓋伏遇皇帝陛下寵厚近班率
循前憲因令疵賤獲被龍光敢忘夙夜之勤以稱乾坤
之施臣無任

四

臣某言伏蒙聖慈特差臣男太子中允雱押賜臣生日
禮物衣一對衣著一百匹金花銀器一百兩馬二匹金
鍍銀鞍轡一副者劬勞之感方愴於私懷寵獎之加更
慙於異數

中謝

伏念臣早塵祿仕多歷歲年初無橫草

之勞但有敗林之愧進膺重任久曠隆恩敢圖誕毓之
辰更冒匪頒之澤此盖伏遇皇帝陛下惇修故事優眷
近司屈聖制以褒嘉示殊私於錫予永惟叨昧彌積震
驚撫已冥

闕

亮難酬於盛德惟時忠慎竊自誓於愚誠臣

無任

五

臣某言伏蒙聖慈特差入內內侍省內東頭供奉官馮宗道傳宣撫問及就府賜臣生日禮物金花銀器一百兩衣著一百匹衣一對金鍍銀鞍轡一副并纓複馬二匹湯藥一銀合御封全者微勞不效僅逃三典之科厚禮有加尚躡九儀之等中謝臣外叨寄屬仰誤眷憐已隲考翼之基重負母慈之教迫勗勞於晚節方不自勝

惟蕃庶之舊恩終無以稱伏蒙皇帝陛下更馳膚使曲
喻至懷駟駿靈珍琛竒組麗豈下流之敢及皆前此之
所無金厄淑旂多錫誠榮於既往鉞刀駕馬強扶難冀
於將來雖天地弗責其謝生顧臣子敢忘於致死臣無
任

給蔡卞假傳宣撫問謝表

伏蒙聖恩以臣疾病特給蔡卞假將臣女子省侍令卞
傳宣撫問諭以調養者飭鑒遣使已叨訓勉於提身輟

侍子寧重累顧哀於慈子教言狎至感涕交流臣趣尚
缺如遭逢榮甚竊食浮而廢任特負知憐昧祿殖以挺
災終貽罪疾伏遇皇帝陛下地容天憐雲蔭露濡响吹
晚出於更生拊偃申加於頻死譬如造化難紀叙於曲
成雖曰糜捐敢稱論而上報臣無任

甘師顏傳宣撫問并賜藥謝表

臣某言膚使寵辭載華原隰寶奩珍劑加賁丘園臣
謝伏念臣少出衡茅晚陪帷幄德輶寄重才淺知深但

念里居長負丘山之責敢期宸眷尚留簪履之矜此蓋
伏遇皇帝陛下天幬無疆海函不棄戴難忘之盛德豈
特銘肌撫易盡之餘生唯當結草臣無任

李舜舉賜詔書藥物謝表

臣某言輟宮闈親近之臣臨湖海寬閑之野授之藥物
撫以訓辭尸厚祿而無勞謂當誅絕捐大恩而不報彌
所兢慙臣

中謝

伏念臣本出羈單自甘淪棄晚由朴學

上誤聖知智曾昧於保身忠每懷於許國讒誣甚巧切

憂解免之難危拙更安特荷眷憐之至沉遠迹久孤之地實邇言易聞之時而離明昭晰於隱微解澤頻繁於疎逖此盖伏遇皇帝陛下以上仁含垢以大智容愚弗使南箕得侈黻揚之狀更令北戶坐蒙臨照之光杳然墜盡之病軀沲若橫流之感涕惟困窮無理猶致命於一餐顧冒昧不貲敢忘懷於九死臣無任

中使撫問謝表

臣某言孤臣疲曳自阻進趨上主慈憐猶加撫諭

中謝

伏念臣晚陪休運特荷異恩橫草無功每恨棄軀之晚
負薪有疾仍慙制祿之優豈謂陛下所摠萬機不忘一
物廼因輜軒之出俯運躋屨之遺仰荷眷私唯知感涕
臣無任

二

臣某言去國彌年屢煩慰恤乘輅便道復賜撫存

中謝

伏念臣冒恩殊深奉事多廢久素餐而無責方宿疚之
有加弗以遐遺實仰慙於眷遇莫知上報徒永誓於靡

捐臣無任

賜湯藥謝表

臣某言隆恩博施弗以遐遺弱力薄才豈能仰稱

中謝

臣久孤重任上誤聖知特荷眷憐備昭誠悃付以便安之郡休其疲曳之軀跋涉之路未窮問勞之恩先至璽書甚厚藥物兼珍此蓋伏遇皇帝陛下丕冒海隅寵綏臣庶簪屨之舊不忍於棄忘雲天之高每存於庇幬永惟報効徒誓言糜捐臣無任

中使傳宣撫問并賜湯藥及撫慰安國弟亡

謝表

臣某言便蕃曲澤雖遠不忘晡晚餘年懼終莫報伏念
臣辭恩機要藏疾里閭既疲瘵之未夷顧憂傷之重至
仰煩眷獎特示閔憐中飭使輶備宣恩厚寵頒藥物深
念衰殘此蓋伏遇皇帝陛下日月昭臨乾坤覆燾俯矜
舊物曲軫睿慈始終顧遇之私人知無替存沒榮懷之
感情實難勝臣無任

李友詢傳宣撫問及賜湯藥謝表

臣某言伏奉聖慈特差李友詢扶護亡男塋棺柩到府并撫問者孤臣特荷慈憐未獲捐軀報德賤息比叨寵獎復以遺骨累恩臣

中謝

伏念臣纍積自躬凶流及嗣

因仍積歲藏厝不時敢謂私憂上貽聖慮伏蒙皇帝陛下飭遣親使護致旅棺使亡子之魂即安於窀穸天性之愛得盡於莫年申之訓辭撫以藥物眷被終始施兼存亡銘骨不足以叙欲報之心瀝肝不足以繼感泣之

血獨恨既愆之力莫知自効之方臣無任

賜衣服銀絹等謝表

臣某言今月十一日准都進奏院遞到詔書并別錄賜臣衣服金帶魚袋銀器絹銀鞍轡馬者慰藉溢言上辜寵眷匪頒異數特荷慈憐臣晚以薄材嘗陪興運華原之簪未慙每辱矜收橋山之劍初遺獨悲淪沮伏蒙皇帝陛下勤追考翼厚勉臣中遽被寵光申加蕃庶雖負薪之末力難效驅馳願結草之殘魂猶知報稱臣無任

中使宣醫謝表

臣某言乘衰攬厲敢意浼聞軫舊垂矜曲加寵數即馳
近御兼飭太醫錫以寶奩實之珍劑創殘再肉顛眴更
蘇沓被慈憐不勝負荷臣叨恩缺報昧祿取災果崇降
以疾殃至上煩於愍惻此蓋伏遇皇帝陛下屢簪念厚
軒幄眷深天弗顓而亦臨雲甫瞻而既雨哀逾察父感
劇孤臣論可報之消埃難知稱効顧未填之溝壑徒誓靡
捐撫涕汎瀾捫心躑躅臣無任

差張謬醫男雱謝表

臣某言伏蒙聖慈特差中使傳宣撫問并賜臣男雱湯藥押冲靜處士張謬至本府醫治者最爾餘生備叨眷撫茫然賤息更荷哀憐

中謝

臣初乏將明之材適遭開

泰之運父子並蒙寵獎臣鄰莫與等夷去闕以來歷時未久問勞狎至憂軫俯加以察父之鴻私施具臣之晚節但慙疲曳莫副馳驅冀憑天地之恩得全駟犢之命永依鞭策共誓靡捐臣無任

賜厯日謝表

臣伏以太史序年將謹人正之授遠臣尸祿乃叨天指
之加臣中謝竊以欽若昊穹靈承黎庶正時所以作事

治厯所以明時恭惟皇帝陛下道邁古初德綏方夏治
教之象上協於天心正朔所加外通乎海表敢圖幽屏
亦誤寵頒徒尊閣以知榮曷縻捐之可報臣無任

二

臣伏以清臺課厯聲明一歲之宜列郡仰成欽布四時

之事闕文切抃拜賜為榮恭惟皇帝陛下躬包歷數政
順璣衡齊日月之照臨體乾坤之闔闢考觀新度遠存
堯象之明推步大端猶得夏時之正盡俯仰察觀之理
槩裁成輔相之宜歲事備存詔文偕下先天誕告閒無
杪忽之差率土逢占驗若節符之合臣敢不恭承闕旨順
考時行贊聖神化育之功極天人和同之効奉而行政
期不戾於陰陽推以治人庶克躋於富壽臣無任

臨川文集卷五十九

欽定四庫全書

臨川文集卷六十

宋 王安石 撰

表

兩府待臬表

請皇帝御正殿復常膳表二道

乞罷政事表一十三道

手詔令視事表

添差男旁勾當江寧府糧料院謝表

詔以所居園屋為僧寺及賜寺額謝表

依所乞私田充蔣山太平興國寺常住謝表

辭免司空表二道

乞致仕表

兩府待臯表

臣某等伏覩內降德音以陝西河東兩路外勤師旅內
耗黎元引咎推恩者臯已以興方懋日新之德經邦弗
效敢辭天討之刑

中謝

臣等昔以九材過叨重任內不

能定國家之論以協士民外不能成疆場之謀以綏四
國用開邊隙亟使人勞至深惻於聖懷實大愆於榮祿
僚官若此即臯為宜唯並寘於嚴科乃大符於公論臣
等無任

請皇帝御正殿復常膳表二道

臣等言奉聖旨以祈雨未應避正殿減常膳者陽春生
物偶霑澤之稍愆睿意恤民遽側身而自抑德已修於
銷變數或係於非常當復彝儀用安羣下

中謝

恭惟皇

帝陛下天仁博施神智曲成躬忘肝食之勞坐講日新
之政四時協序萬物致和適當化養之辰宜得涵濡之
澤少違常候深軫清衷退師氏之正朝約太官之盛饌
仰窺謙德志在閔民然而遐虜來朝當即法官之位誕
辰入慶合陳燕俎之珍事有所先禮難偏廢伏願仰回
淵聽俯徇輿情夙御九筵之居並羞十閣之具上以全
於國體下以副於臣誠臣無任

臣某等言近上表請御正殿復常膳蒙降批答不允者
時澤偶愆屢勤齋禱聖衷愈勵曲盡焦勞將損已以召
休因退次而貶食列陳剡奏尚闕嗣音在臣列之靡遑
伏帝閣而再扣中謝恭惟皇帝陛下體居離正德稟乾
剛期揉俗以致康嘗納隍而興念七載于此繼獲豐穰
一春而來或罹愆亢皇慈深軫羣祀徧修恐狴犴則
親慮其因懼黼黻美則躬變其服仍損內饗之舉兼虛
正宁之朝然而禮貴從宜事難泥古而況甫臨誕節交

舉慶儀有列辟拜萬年之觴有殊俗修兩朝之好苟虧
彝制難副羣情少屈淵衷特從誠懇天臨廣廈日御常
珎親事法官廊宣於政治惟辟玉食昭示於等威仰以
慰兩宮之慈俯以安羣下之望臣等無任

乞罷政事表三道

臣某言竊以使陪國論惟亮天工必用強明乃能協濟
豈容昏瞽可以叨居進冒聰明罄陳危惓中謝伏念臣
運侍先帝列官外朝晚以喪歸因為病廢伏遇皇帝陞

下召還辭禁擢豫經筵收於衆惡之中諷以萬機之事
搆讒誣而並至輒賜辨明推孤拙以直前每蒙開納陛
下所以遇臣者可謂厚矣臣之所以報國者終於缺然
豈理勢之獨難抑才能之素薄方懼過尤之積乃罹疾
疾之加比欲外乞州藩冀以就營醫藥重念采薪之弗
給尚何守土之敢謀輒緣不能者止之言庶免貪以敗
官之悔伏望皇帝陛下曲垂仁惻俯記愚忠賜以分司
一官許於江寧居止則天地之德實有施於餘年犬馬

之勤冀或輸於異日臣無任

二

臣某言近具表乞罷政事分司伏奉手詔封還不允所
乞者私懷懇至已具布聞聖訓丁寧未蒙開納敢冒崇
高之聽再輸悃悞之情中謝臣聞任賢之方要其有用
陳力之義止於不能苟弗集於事功且重罹於痰疾豈
容叨據以累明揚伏念臣猥以孤生親逢盛世昧於量
已志欲補於休明失在信書事浸成於迂闊每煩衆論

上恩聖聰久知素願之難諧繼以積病而自困辭而去
位庶逃竊食之誅勉以就工重荷包荒之德雖貪順命
終懼妨功伏望皇帝陛下闕度并容大明俯燭特垂矜
允俾遂退藏如此則孤進之身獲全生於末路具瞻之
地得改命於時材臣無任

三

臣某言近再具表乞罷政事伏奉批荅不允者封奏上
昭未能感徹訓辭下逮更誤褒嘉

中謝

臣聞恕以及物

者君之仁量而受事者臣之義蓋世之道有升而有降
故士之行或肆而或拘遭聖治之尚容冀私誠之獲遂
伏念臣自蒙任使已歷歲時雖或售於小忠曾莫裨於
大政迨茲櫻疾乃始告勞姑以免邦憲之詰誅何足汗
上恩之獎勵使人狎至詔指屢頒祇荷顧憐重懷感悸
非不願粗施其樸學庶幾以仰副於鴻私顧惟剛德之
浸亨方奮睿謀而獨斷辨忠賢之可任既示弗疑察姦
罔之為朋將知所畏人宜盡力朝豈乏材寧容昏億之

餘尚冒寵靈之厚伏望皇帝陛下離明俯燭解澤旁施
矜綿力之既愆監近司之或曠俯從控懇實允詢謀雖
已事之無稱難言報國冀餘生之未泯尚獲捐軀臣無
任

乞出表二道

臣某言竊以丞相之職天子是毗方當圖政之憂勤難
以養痾而昧冒輒輸情素仰丐恩憐

中謝

臣叨被鴻私

誤尸榮祿堯仁天覆幸荒穢之魚色湯聖日躋願卑凡

而自絕尚惟許國姑誓忘軀豈意眩昏甫新年而寢劇
更知篤蹇難重任之久堪伏惟皇帝陛下明燭隱微惠
綏羈拙閱其積疾收還上宰之印章賜以餘年歸展先
臣之丘壟生當擊壤以詠矜容之德死當結草以酬含
育之恩臣無任

二

臣某言今月十一日輒輸情素仰丐恩憐實以抱疾之
深難於竊位之久過蒙敦獎未賜矜從事有迫於懇誠

理必祈於哀惻

中謝

臣信書自守與俗多違審容膝之

易安因忘擇地知戴盆之難望遂廢占天豈圖憂患之
餘更值清明之始寒之之日長而暴之之日短植之之
人寡而拔之之人多尚誤聖知驟妨賢路摩頂放踵雖
願效於微勞以蚊負山願難勝於重任矧復瞽昏而曠
事若猶冒昧以尸官是乃明憲之所不容豈特煩言之
為可畏伏惟皇帝陛下天地覆載日月照臨賜以曲成
容其少愒區區旅力或未愆於餘年斷斷小能冀尚施於

異日臣無任

乞退表四

臣忠於為國故進而能致其身君恕以及人故病則閔
勞以事此今昔共由之通義實上下相與之至情敢觸
冒昧之誅冀蒙哀矜之聽

中謝

臣受材鄙劣遭運休明

陳愚或會於聖心承乏遂尸於宰事謀謨淺拙謾不見
其有成操行陵夷又或幾於無耻久宜辭位尚苟貪恩
豈圖養拙以乖方重以習昏而廢務粗嘗陳列未獲矜

從黽勉以來浸淫遂劇大懼典司之曠上煩程督之嚴
伏惟陛下詢事考言循名責實或輟夜分之寐常臨日
昃之朝萬方黎獻之多略皆祗辟三事大夫之守豈可
療官仰冀高明俯昭惻愍念其服勞之久愍其撓瘵之
深及未干鈇鉞之時令遂解機衡之任豈特少安於私義
茲惟畢協於師虞臣無任

二

臣昨具表乞解機政伏奉手詔未賜俞允者明主訓辭

之寵宜即奉承匹夫志守之愚敢覬矜允

中謝

竊以品

制百為摠裁萬務任怨蓋難於持久服勞安可以獨賢
所以中外迭居是為祖宗故事況於疲曳加以簪昏若
由昧冒而無慙其必顛隳而不救臣過叨眷獎備進近
司當循名責實之時故任怨特多於前輩兼蠲令改制
之事故服勞尤在於一身雖蒙全度之恩僅免譴訶之
域其於多故實以難支矧疾疢之交攻且事為之浸廢
伏望陛下昭其悃悞假以優游使得休養於哀疲以示

保全於孤拙臣無任

三

臣某言近具表乞解機務伏奉手詔未賜俞允者聖恩所及有隆天重地之施私義未安有深淵薄冰之懼

中謝

竊惟成湯高宗之世有若伊尹傳說之臣其道則格于帝而無疑其政則加乎民而有變后惟時又相亦有終迨乎中世之陵夷非復古人之髣髴忠或不足以取信而事事至於自明義或不足以勝姦而人人與之為敵

以此乘權而久處孰能持祿以少安此臣之慮危於居寵之時而昧死有均勞之乞況於抱病浸以療官伏惟陛下道與日躋德侔乾覆哀一夫之失所樂萬物之皆昌矧夫眷遇之優既已勤劬之久宜蒙善貸使獲曲全賜其疲賤之身假以安閑之地則敝車無用猶可具於勞薪棄席未忘或再施於華幄臣無任

四

臣某言伏奉聖旨令臣入見赴中書供職者螻蟻微誠

屢關省覽天地大德未賜矜從

中謝

臣聞周之士也貴

秦之士也賤周之士也肆秦之士也拘其縱之為貴其拘之為賤賤故尚勢利而忘善惡貴故尊行義而矜廉耻士知尊行義而矜廉耻宗廟社稷之安而天下自治也伏惟陛下言必稽堯舜動必憲文武故視遇天下之士欲其貴不欲其賤欲其肆不欲其拘臣以羈孤旁無欣助一言寤意特見甄收適遭欲治之盛時實預扶哀之大義事或乖於衆口而陛下力賜辯明言有逆於聖

心而陛下常垂聽納此臣所以履艱虞而不忘服勤苦而不辭雖百度搶攘未就平成之叙然四年黽勉非無夙夜之勞今特以心氣之衰疲目力之昏耗哀祈外補無幸小休而乾剛確然莫可回奪則是親值周家之忠厚獨為秦士之賤拘事與願違能無竊歎理當情恕豈免上煩實望聖慈俯昭愚款外賜優閑之地少安疾疢之身須其有瘳乃責外効臣生當捐軀以報德死當結草以酬恩

乞宮觀表四道

臣某言疏榮特異敢忘圖報之忠陳力弗能當布可辭之義

中謝

伏念臣晚陪興運久汙近司懿愚弗逮於清

光衰疾更成於瘵曠苟免大訶之責乃叨異數之加授以戎旃班之宰席松楸舊國實使鎮臨蒲柳殘年足為榮耀願在宣化承流之地方當循名責實之時疲曳難支顛隳可畏仰祈睿眷俯徇愚衷并解將相之官外除宮觀之任託依田里瞻守丘墳儻憑休養之私終獲夷

瘳之福敢忘策勵復誓靡捐臣無任

二

臣某言近具表乞以本官外除一宮觀差遣伏蒙聖慈特降中使賜臣詔書不允者天地至恩實知難報螻蟻微息尚竊有懷輒冒隆威更輸危悃伏念臣遭逢異甚稱効蔑如苟旅力之可陳豈餘生之足惜願以憂傷而至獎重為疾疾之所撓偷假便州必負曠瘵之責過尸厚祿更懷叨昧之慙伏望陛下本末燭知始終護念俯

徇籲天之懇俾無累國之尤尚冀寧瘳誓終靡殞臣無任

三

臣某言軫傳俯臨璽書狎至仰荷眷存之厚第懷感悸之深任有不勝勉非所及輒輸危懇再冒天威伏念臣久誤至恩難圖報稱過尸榮祿易取災危力憊矣而弗支氣喘焉而將蹶窮閭掃軌斯為待盡之時莫府建旄豈曰養病之地所懼曠瘼之責敢辭逋慢之誅伏望陞

下照以末光遂其微請使壇陸之鳥無眩視之悲濠梁之魚有從容之樂庶蒙瘳復更誓糜捐臣無任

四

臣某言筋骸衰苾僅有餘生肝膈精微簡在聖聽豈圖寵獎未賜矜從輒冒威尊更輸情素

中謝

伏念臣久妨

機要初乏涓埃苟免庶尤實荷恩私之至敢緣多疾更尸名器之崇比辱使軺係宣詔旨深惟策勵仰稱龍光而況病瘵有加療治無損辭榮家食乃為理分之宜干

澤自營尚恃眷憐之舊伏惟皇帝陛下衡聽萬事罷使
衆材念其黽勉之終難假以便安而少愒庶完體力圖
報毫分臣無任

手詔令視事謝表

臣某言伏蒙宣示言者所奏輒具劄子乞博延公議改
用賢人伏奉詔獎勵令視事如故者謗議升聞已賴舜
聰之豁達懇誠上訴更煩周誥之丁寧竊以作威者主
之權待察者臣之禮蓋雖蒙非常之厚遇亦將避可畏

之煩言臣志尚非高才能無異舊惟所學之遠闊難以趨時因欲自屏於寬閑庶幾求志惟聖人之時不可失而君子之義必有行故當陛下即政之初輒慕昔賢際可之仕越從鄉郡歸入禁林或因勸講而賜留或以論思而請對愚忠偶合即知素願之獲申睿聖日躋更懼淺聞之難副重叨殊獎忝秉洪鈞所宜引分以固辭乃敢冒恩而輕就實恃明主知臣之有素故以孤身許國而無疑人習玩於久安吏循緣於積弊竊言不忌諛行

無慙論善俗之方始欲徐徐而變革思愛日之義又將
汲汲於施為以物役已則神志有交戰之勞以道徇衆
則事功無必成之望恐上辜於眷屬誠竊幸於退藏猶
貪仰附於末光亦冀粗成於薄効比聞獨斷謂合僉言
但輸承命之忠遂觸招權之毀因請避衆賢之路庶以
厭異議之人伏蒙皇帝陛下敦大魚容清明苟燭賜之
神翰諭以至懷君臣之時嘗千載而難值天地之造豈
一身之可酬敢不自忘形迹之嫌庶協神明之運臣無

任

添差男苟句當江寧府糧料院謝表

臣某言近輒冒昧陳乞男苟句當江寧府糧料院一次
伏蒙特恩添差者去寄卧家猶尸厚祿祈榮及嗣更荷殊

私

中謝

伏念臣汗馬之勞初無可紀舐犢之愛乃敢有

言顏雖腴以知慙心固甘於獲譴豈謂陛下矜軒輊之
舊錄簪履之微示特出於上恩俾遽叨於世祿繫曲成
之造化弗以遐遺徒共誓於靡捐安能仰稱臣無任

詔以所居園屋為僧寺及賜寺額謝表

臣某言基迹叢祠冀鴻延於萬壽錫名扁榜竊榮遇於
一時臣生乏寸長世叨殊獎賤息奄先於犬馬頽齡俯
迫於桑榆獨念親逢莫有涓埃之補報永惟宏願豈忘
香火之因緣伏蒙皇帝陛下俯徇祈誠特加美稱所懼
封人之祝終以堯辭乃塵長者之園遽如佛許仰憑護
念誓畢熏修臣無任

依所乞私田充蔣山太平興國寺常住謝表

臣某言緣恩昧冒方虞恩上之誅加意畀矜遂竊終天之幸伏念臣少嘗陞阨晚悞褒崇榮祿雖多不逮養親之日餘年向盡更為哭子之人追營香火之緣仰賴金繒之賜尚復祈恩而不已乃將徼福於無窮伏蒙陛下眷遇一於初終愛恤兼夫存沒特撓常法俯成私求雖老矣無能莫稱漏泉之施若死而未泯豈忘結草之酬臣無任

辭免司空表二道

臣某言今月十一日三班差使崔汝諧至奉宣詔旨及
齋賜制誥一道除授臣司空依前觀文殿大學士集禧
觀使加食邑四百戶食實封一百戶餘如故者使軺馳
授祇忝明恩家巷卧居敢叨虛獎

中謝

竊以事官之所

命異於時制之今除名稱三公班序一品逢辰特幸稱
位實難臣晚玷誤恩嘗尸劇任曾無尺寸粗報眷憐獨
有丘山莫知負載荒遠撓痾之久休明嗣服之初繇力
薄材適甘於屏弃高秩厚禮更冒於褒崇惟罷與名恐

身累國仰祈遷令追寢贊書庶以哀殘獲所安之終吉
亦令蹇淺免非據於具瞻臣無任

二

臣某言近具表乞追寢恩命伏蒙聖慈特降詔書不允
者隆施所逕懇辭弗俞輒冒天威更輸微款

中謝

臣事

勞無紀操行不修居竊萬鍾初未知於辭富坐彌九載
方有俟於黜幽豈圖邦命之新尚眷求人之舊寵靈輟
被危厲增加位高疾顛力少任重實前修之切戒敢小


醜之冒膺仰冀睿明顧憐哀朽改茲非服免貽官誥之憂宥以罔功使獲里居之佚臣無任

乞致仕表

此表不曾奏發
薨後檢見遺藁

臣某言療以曠官嘗恃食功之舊老而辭祿敢忘知止之廉輒冒天威具輸微款伏念臣小聞寡識薄力淺材信獨善以一心昧自營之百慮久辜視遇特幸遭逢昔也壯時尚無可紀今而耄矣豈有能為敢望睿明許之致仕實矜危朽賜以全生庶以衰殘豫佚太平之樂亦

令遲暮免離大耄之嗟



臨川文集卷六十

欽定四庫全書

集部

臨川文集卷六十三

一至

詳校官庶吉士臣龍廷槐

檢討臣何思鈞覆勘

覆校官中書臣呂雲棟

校對官主簿臣汪日贊

謄錄監生臣張鴻仁

欽定四庫全書

臨川文集卷六十一

宋 王安石 撰

表

賀冊仁宗英宗徽號禮成表

賀景靈宮奉安列聖御容表

賀哲宗皇帝登極表

賀升祔禮成表

英宗山陵禮畢慰皇帝表

又慰太皇太后表

又慰皇太后表

英宗祔廟禮畢慰皇帝表

又慰太皇太后表

又慰皇太后表

慈聖光獻皇后昇遐慰皇帝表

慈聖光獻皇后啟殯及復土返虞慰皇帝表二

道

慈聖光獻皇后神主祔廟慰皇帝表

慈聖光獻皇后暮祥除慰皇帝表

正旦奉慰表

魯國大長公主薨慰表

八皇子薨慰皇帝表

八皇子葬慰皇帝表

謝宰相笏記

謝翰林學士笏記

知常州謝上表

南郊進奉表

代鄆州韓資政謝上表

代王魯公乞致仕表三道

代人賀壽星表

代人明州謝上表

代王魯公德用乞罷樞密使表三道

賀冊仁宗英宗徽號禮成表

臣某言伏覩進奏院狀報冊告仁宗皇帝英宗皇帝徽
號禮成者肇稱縟禮追薦鴻名揚二聖之閔休風四海
以純孝惠心昭假釐事備成臣中謝恭惟仁祖以堯之
巍巍丕冒區夏英考以舜之業業祗承廟祧紹隆德至
於難名宗報義存於無已皇帝陛下仰稽前憲俯采庶
言命冊使而致嚴告匱主而歸美神靈率籲其啟後於
無疆品庶交欣以奉先而不匱臣備叨殊眷獲睹上儀
顧久負於沉痾乃獨妨於旅進臣無任

賀景靈宮奉安列聖御容表

臣某言新
一代之上儀極二端之美報經始有倣實自
睿謀歡成無疆乃惟衆志臣中謝竊以閔宮鬼享周特
腆於姜姬原廟神游漢獨隆於高帝遠或遺祖近止及
親恭惟皇帝陛下服卑而即功食非以致孝嚴祖宗之
衆像依仙釋而異宮館御因時初豈忘於苟簡修除備
物乃有待於純熙宸宇祕嚴扁榜崇麗裸獻式序安侑
維時藐然往初孰此倫擬臣久尸榮祿尚負宿痾聞釐

事之既成與羣情而偕樂臣無任

賀哲宗皇帝登極表

臣某言伏觀赦書皇帝陛下今月五日登寶位者郊廟
神靈永有宗依華夏蠻夷永有歸賴中謝恭惟皇帝陛
下光御歷服大承統緒以聖繼聖純祐無疆臣遭遇先
朝久叨榮祿不獲奔走瞻望清光臣無任

賀升祔禮成表

臣某言伏觀進奏院狀報七月十二日升祔禮成者涓

選休辰肇稱吉禮神靈底豫品庶交欣中謝竊以登儼
紫庭歸配清廟於稽在昔有舉維時恭惟皇帝陛下德
茂承祧志深念祖倣唐文而制作致舜孝於烝嘗釐事
既成歡心溥協臣尚揆衰疾久隔清光陪九賓之臚傳
獨無厚幸偕四方而來賀徒有微誠臣無任

英宗山陵禮畢慰皇帝表

臣某言須百祀之材已襄葬故設九虞之主方考祔儀
伏惟皇帝陛下德懋欽明道隆勤孝雖送終之禮已備

而追遠之念甫深惟順變以抑哀實含生之至願臣限分鎮守阻豫班朝臣無任

慰太皇太后表

臣某言宮車云返陵邑既營凡在照臨豈勝摧慕伏惟太皇太后道侔坤育仁出天成永懷愛孝之隆尤積悲恫之感稍舒慈念實慰輿情臣叨備從官限分符守徒有攀號之至痛初無辨護之微勞臣無任

慰皇太后表

臣某言威靈有集方祔於廟祧感慕無窮外覃於蠻貊
伏惟太后比賢任姒績慶塗章祗協孫謀克襄大事地
非蒼梧之遠勢有霸陵之安唯割至哀尚膺遐福臣備
官有守奔問無階臣無任

英宗祔廟禮畢慰皇帝表

臣某言七月而葬既充奉於寢園萬世不祧遂崇成於
廟室凡居覆燾同盡攀號伏惟皇帝陛下膺保聖神踐
行仁孝纏哀罔極率禮無違仙遊既集於宗祊聖念彌

勤於翼室仰祈順變俯瞻含生臣符守所櫻班朝莫豫
臣無任

慰太皇太后表

臣某言威靈來返祠廟有嚴序陳昭穆之倫定列祖宗
之次哀號罔極遐邇所同伏惟太皇太后功佐帝圖德
齊坤載永惟孝愛尤積悲懷冀紓天性之慈以永母儀
之福臣無任

慰皇太后表

臣某言宗祏告成皇靈來燕凡居覆露同盡哀摧伏惟
太后協慶塗山比賢太姒方正坤儀之位上同乾施之
仁虞祔奄終攀號靡極冀哀恫之有節膺福履之無疆
臣限守州符阻趨天陛臣無任

慈聖光獻皇后昇遐慰皇帝表

臣某言伏以上天降禍太皇太后奄棄大養伏惟皇帝
陛下攀號感慕聖情難居臣限以衰疾在遠不獲奔赴
闕廷臣無任

慈聖光獻皇后啟殯及復土返虞慰皇帝表
臣某言伏以日月徂遷伏承太皇太后諏辰協吉肇啟
殯宮聖情攀號何以勝處恭惟皇帝陛下聖孝發中天
報備至感嘆推咽遐邇一情臣無任

二

臣某言伏承太皇太后神宮復土奄及返虞聖心傷摧
何以勝處恭惟太皇太后天助懿德以扶昌運輔佐保
佑功施三朝粵自棄捐宮闈爰及襄事陛下哀恫夙夜

發於至情追奉致隆有溫常禮顯情報德內外單盡孝
治所形人用感歎臣伏限在遠無緣奔走瞻望闕庭臣
無任

慈聖光獻皇后神主祔廟慰皇帝表

臣某言伏承慈聖光獻皇后神主祔廟既克禮成伏惟
皇帝陛下聖孝終始哀慕難勝日月徂遷禮有順變伏
望少抑至情以幸天下臣無任

慈聖光獻皇后祔祥除慰皇帝表

臣某言伏以日月流邁太皇太后捐棄大養奄及暮祥
仰惟聖孝攀慕無極伏望深加裁抑以幸萬方臣限以
衰疾無緣奔詣闕庭臣無任

正旦奉慰表

臣某言伏以日晷流邁歲歷肇新太皇太后棄捐宮闈
奄歷時序伏惟皇帝陛下聖孝天至感慕難勝臣以衰
疾無緣奔走瞻望闕庭臣無任

魯國大長公主薨慰表

臣某言伏覩進奏官狀報魯國大長公主薨背伏惟聖情痛悼臣以衰疾無緣奔走伏望以理寬釋俯慰羣情臣瞻望闕庭無仕

八皇子薨慰皇帝表

臣某言伏覩進奏院報八皇子薨背伏惟聖情悲悼難任敢乞抑割天慈以幸萬邦臣瞻望闕庭無仕

八皇子薨慰皇帝表

臣某言伏聞鄆王襄事有日靈輓即路伏惟聖情悲悼

難勝敢乞割抑天慈以幸天下臣瞻望闕庭無任

謝宰相笏記

祇荷寵靈載懷感懼竊念臣志雖慕古才不逮時誤蒙
記憐特賜收用伏惟皇帝陛下紹膺天統遵養聖功旁
招雋良橫及疎賤誓當罄竭仰稱龍光臣無任

謝翰林學士笏記

含哀去國扶僊造朝黼坐禁嚴許之燕見玉堂閎麗賜
以叨居申飭使人就傳德意事雖有故寵實非常莫知

報稱之謂何徒荷眷求之如此臣無任

知常州謝上表

臣某言以貧擇利以病辭

開

此於督責之朝皆在譴何

之域

中謝

伏念臣比在羣牧常求外官蒙恩朝廷改職

畿縣未識賢勞之力已纏悖眩之病區區本懷懇懇自

訴遂蒙優詔特與便州維臣之愚所學非敏受祿則辭

貧而取富當官則讓劇而求閒使有以臨知罪其極此

蓋伏遇皇帝陛下明照萬物寬惠四方在宥而不探其

可誅因能而不責其所乏顧雖無用於當世嘗以有聞
於先臣思報所蒙敢忘盡瘁然而州郡撫循之勢患在
數更官司考課之方要諸久仕惟此弊邑比多凶年歲
行兩周守吏八易當郡人煩勞之後以臣身疲病之餘
自非少假以歲時將必上孤於器使所祈降鑒姑使息
肩則斷斷一臣不獨免於大戾元元萬室儻有望於小
休臣瞻天禱聖無任

南郊進奉表

江寧

臣某言伏以郊兆宗祈臣工顯相慶九畿之藩屏備萬物之貢輸前件物掌於邦財歛自民職竊覩燎裡之盛式修幣獻之常臣無任

代鄆州韓資政謝表

臣某言秘殿升華名城借重寵靈溫分媿懼交懷中謝竊念臣世系單平天姿滯固親逢文雅之會首玷秀廉之科黽勉在公優游過紀被蒙眷與度越等夷省寺備官禁庭充衛分無可采懼抵冒於憲章寸有所長使裨

參於治政朴忠自信智慮罕通未盡將明之才已干訶
謫之典至寬之度橫貸其愆褫夫左右之聯寄以東南
之屏敗財傷錦宜有衆多之譏增秩賜金本非平素之
望敢圖上聖復眷孤臣就徙通班改司善部惟汶陽之
奧壤乃魯服之大邦豈繁薄材稱是煩使此蓋皇帝陛
下遇臣之造於遠不忘燭物之明雖微必逮追惟踣屨
之舊特借叢雲之休切自揣循將安報稱敢不激昂志
尚陳悉政經宣布詔條之寬綏安風俗之厚庶幾一得

少補萬分臣無任

代王魯公乞致仕表

德用

臣某言臣聞下之所以忠於上力已愆則不敢瘝厥官
君之所以愛其臣年已至則不思勞以事敢緣茲義冒
盡所言中謝伏念臣以斗筭之材加犬馬之齒比嘗得
謝誤復見收血氣既衰日月逾邁固已積妨賢者之路
豈獨多曠朝廷之儀伏望聖慈許令致仕則賴天之力
使終晚節之優游訖臣之身得免大誅之憤眊臣無任

二

臣某言愚臣之在暮年禮當求去聖主之於舊物恩不忍捐顧在禮之可言敢緣恩而苟止

中謝

伏念臣起身

疵賤逢世休嘉年除歲遷遂塵於非望夙興夜寐常媿於無勞惟是寵榮殊非所欲矧知固陋豈敢為高徒以歲路之向窮不勝人言之甚衆爭前而冒寵則辱之在後也或多蓋衆以擅榮則患之及身也常酷是亦有傷於國體豈惟無補於臣身此臣所以迫切於歸誠而彷徨

徃於受命也況陛下接三后之烈享百年之平勢盈則非易以持法久則當通其變此誠致慎於安危之際而責難於將相之時雖臣旅力之方剛亦宜知止豈此餘生之無幾尚可妨賢伏望天慈俯循人欲上以終愛人之德下以免累國之誅則膺力既愆雖負捐軀之素志餘忠未訖猶知請祝於明時干冒宸嚴臣無任

三

臣某言竊以將相之權臣之所貪得君親之命臣之所

憚違懇懇至於辭說之窮區區亦惟義理之迫中謝伏
念臣典司機密陪輔清光年之侵尋職以曠廢假息幸
蒙於寬政引身輒勾於餘年豈期愚衷未動聖察令臣
股肱便敏足以趨賓贊之儀耳目精明足以副謀謨之
託雖知當退猶願自強奈何獨以罷癯之軀而欲久私
要劇之地自計且知其不可人言孰以為當然伏望聖
慈哀憐惻怛無空敦獎使得罷休臣無任

代人賀壽星表

臣某言上靈儲祉南極效祥凡在觀瞻實增慶抃伏以
皇帝陛下紹休三聖博愛萬方唯乾則之非常宜星文
之底應臣叨塵要近親會休嘉豫聞太史之占敢後封
人之祝無任

代人上明州到任表

臣某言奉勅差知明州已於某月到任訖夷越故區東
南窮處施澤之下歡然有生底身於茲坐以無事中謝
臣受材素薄推數頗奇居有朴忠之心進無通顯之路

晚塵卽位頗切郡章歸待罪於省中退得藩於海上自
初受命以至造官歷年兩周取道萬里備更艱阨職臣
之分使然卒就宴安賴上之恩抵此餘年且索旅力已
愆尚何施為可以報稱於苟利國家之事靡所不思及
未填溝壑之時庶幾無愧臣無任

代王魯公德用乞罷樞密使表

臣聞周任有言曰陳力就列不能者止自惟賤官之守
猶或不敢冒居況於任重責大安危所繫豈其瘥昏憊

耄可以久饗敢緣前言上冒聖聽伏念臣以疵賤之身
遭逢陛下拔擢兼官將相典領機密內之無陪輔將明
之効外之無折衝禦侮之勞是陛下所以寵臣者不可
勝言而臣之所以報陛下者未嘗能稱況今犬馬之
齒七十有七不能者止宜在此時顧貪戀聖世未敢乞
身田里長違陛下左右惟機務之衆非臣疲曳所能勉
強伏望陛下憫臣無狀賜罷樞密院職事毋使久塞賢
者之路臣不勝祈恩待命激切之至

二

臣比以殘餘之生久壅賢路願還要職退就散地天聽
高邈未蒙照省惓惓之私竊不自寧敢緣厚恩求必愚
瞽臣聞量臣以授官者君之所以仁於下也審已以從
事者臣之所以忠於上也今臣罷老雖近在臣身謀之
有所不給況於官隆事劇所摠不一以臣審已誠不宜
久叨權寵畏負陛下任使之意伏惟陛下量臣之聰明
不足以逮事量臣之強力不足以副禮聽臣所丐毋令

四方有議陛下信任之失而臣亦賴陛下之賜免於官
謗臣無任

三

惓惓之私至於再三上恩聖德而終未蒙省察獎誘過
渥非臣所堪區區之愚豈敢苟止伏念臣以顓蒙遭遇
拔擢人臣貴寵少在臣右而勞烈行治無稱於時機密
之地安危所繫雖臣方壯固懼不稱況於殘年餘日豈
宜尚汚印綬為朝廷羞方今明明在上濟濟多士足以

典司樞要補敝救失稱陛下任使副元元之望者甚衆
陛下雖欲苟私愚臣臣雖欲自侍左右稱所以幸臣之
意豈惟公論於臣有所不容誠恐覆餗以虧陛下知人
之明而令賢能宜在高位者久踣於聖世則夷身毀宗
不足以塞責矣伏惟陛下哀臣懇迫聽臣所丐以終陛
下眷寵老臣之賜臣無任

臨川文集卷六十一

欽定四庫全書

臨川文集卷六十二

宋 王安石 撰

論議

郊宗議

答聖問賡歌事

看詳雜議

詳定十二事議

郊宗議

伏奉聖問
撰議繳進

問郊祀后稷以配天宗祀文王於明堂以配上帝二者
皆配天也或於郊之圜丘或於國之明堂或以冬之日
至或以季秋之月或以祖或以禘或曰配天或曰配上
帝其義何也對曰天道升降於四時其降也與人道交
其升也與人道辨冬日上天與人道辨之時也先王於
是乎以天道事之秋則猶未辨乎人也先王於是乎以
人道事之以天道事之則宜遠人宜以自然故於郊於
圜丘以人道事之則宜近人宜以人為故於國於明堂

始而生之者天道也成而終之者人道也冬之日至始而生之之時也季秋之月成而終之之時也故以天道事之則以冬之日至以人道事之則以季秋之月遠而尊者天道也邇而親者人道也祖遠而尊故以天道事之則配以祖禰邇而親故以人道事之則配以禰郊天祀之大者也徧於天之羣神故曰以配天明堂則弗徧也故曰以配上帝而已夫天與人異道也天神以人事之何也曰所謂天者果異於人耶所謂人者果異於天

耶故先王之於人鬼也或以天道事之蕭合稷黍臬陽
達於牆屋者以天道事之也嗚呼天人之不相異非知
神之所為其孰能與於此此禮也尚矣孔子何以獨稱
周公曰嚴父配天者以得天為盛天自民視聽者也所
謂得天得民而已矣自生民以來能繼父之志能述父
之事而得四海之驩心以事其父未有盛於周公者也

答聖問賡歌事

臣聞叙有典秩有禮命有德討有罪皆天命也人君能

勅正則治不能勅正則亂所以勅之不可以無其為一也然為於可為之時則治為於不可為之時則亂故人君不可以不知時時有難易事有大細為難當於其易為大當於其細機者事細而易為之時也故人君不可以不知幾帝庸作歌曰勅天之命惟時惟幾此之謂也人君雖知此然賢臣不心悅而服從則不能興事造業而熙百工乃歌曰股肱喜哉元首起哉百工熙哉此之謂也夫欲股肱之喜蓋有其道矣蓋人君率其臣作而

興事在明乎善而已明乎善在所為法以示人者當所
為法以示人者當乃股肱之所以喜也股肱喜而事功
成事功成而能屢省以不怠廢此又股肱之所以喜也
為是者在欽而已矣皐陶拜手稽首颺言曰念哉率作
興事慎乃憲欽哉屢省乃成欽哉此之謂也蓋憲者為
法以示人之謂也所為法以示人者當率法慎為能然
欽慎而不明乎善亦何能濟故人君者以明乎善為難
苟明乎善矣則人臣孰敢為不善人臣無敢為不善事

其有不治者乎乃賡載歌曰元首明哉股肱良哉庶事
康哉此之謂也人君不務近其人論先王之道以自明
而苟欲以耳目所見聞總天下萬事而斷之以私智則
人臣皆將歸事於其君而不任其責淫辭邪說並至而
人君聽斷不知所出此事之所墮也又歌曰元首叢脞
哉股肱惰哉萬事墮哉此之謂也然則人君欲股肱良
而庶事康不在乎他在明乎善而已明乎善不可以責
諸人也伏惟天錫陛下以堯舜之材自秦漢以來欲治

之主固未有能髣髴者然百工未熙庶事未康者殆所謂近其人論先王之道以自明者尚有所缺而非可以他求也臣昨日蒙德音喻及尚書賡歌之事而愚忤倉卒言不及究故敢復具所聞以獻伏惟聖心加察幸甚

看詳雜議

臣今月二日至中書曾公亮傳聖旨以雜議一卷付臣看詳臣謹具條奏如後

議曰官有定員則進趣雖多不能為濫宜定臺省監

寺之員須有闕然後用

臣某曰今之臺省監寺之官雖名曰職事官而實非前代之所謂職事官而與前代刺史等所帶檢校官無以異前代檢校官之類亦不能定員待有闕然後擬前代所謂職事官即今所謂差遣是也今之差遣固已有定員須有闕然後用人矣若欲令今所謂職事官亦有定員則今職事官以差遣員數校之幾至兩倍而有功有考當陟者又未有以禦之欲有定員所謂可言而不可

行者也

議曰內外之官正其名稱出則正刺史縣令之名入則還臺省之名

臣某曰前代有勲官有散官有檢校官有職事官勲官散官當其有罪則皆得議請減而應免官則又可以當官而檢校官與今行守之官無異故朝廷與奪皆足以為人榮辱利害今散官勲官檢校官既不足以為人榮辱利害為人榮辱利害者唯有職事官與差遣而已今

若令内外官正其名稱出則正刺史縣令之名入則還臺省之名則是丞郎知州謂之刺史京朝官知州亦謂之刺史不知職事官之貴賤何以別乎又其祿秩位次不知當復如何若同之則理不可行若不同則與未名之時又何以異臣以為今州郡長吏謂之知州非不正名所領職事官乃與前代刺史等帶檢校官無異何傷於正名而欲改之乎且漢以丞相史刺察州郡謂之刺史今欲名州郡長吏為刺史則何得謂之正名

議曰罷官而止俸

臣某曰文王治岐仕者世祿武王克商庶士倍祿蓋人主於士大夫能饒之以財然後可責之以廉恥方今士大夫所以鮮廉寡恥其原亦多出於祿賜不足又以官多員少之故大抵罷官數年而後復得一官若罷官而止俸恐士大夫愈困窮而無廉恥士大夫無廉恥最人主所當憂且邦財費省之大原乃不在此議者但知引據唐事乃不知唐時官人俸厚故罷為前資未至困乏

今官人俸薄則與唐時事不得同且不吝於與人以官而欲吝於與官以祿非計之得也

議曰以釐務實日併為三年以叙磨勘之法以符考績之義

臣臬曰今欲以釐務實日併為三年以叙磨勘之法竊以為不釐務者非人情之所欲也釐務者非人情之所苦也今等之無功而釐務則計日得遷等之無罪而不釐務則不得計日而遷恐未足以符考績之義而適足

以致不均之怨也且黜陟之法務在沮勸罪功不知立法如此有何沮勸

議曰置兵部審官院

臣某曰崇班以上置兵部審官院此恐可議而行然崇班以上差遣盡付之兵部則不可行當約文字之法相度所任輕重緩急有付之審官者有屬之樞密者至於磨勘則官視卿監以下皆付之兵部審官可也

議曰置兵部流內銓以代三班及置南曹

臣某曰三班院無以異於兵部流內銓何必以代三班乎今三班自無闕事而又增置南曹則非省官之意

議曰廢江淮荆浙發運使

臣某曰江淮荆浙發運使嘗廢矣未幾復置者以不可廢故也蓋發運使廢則其本司職事必令淮南轉運使領之淮南轉運所總州軍已多地里已遠而發運使據六路之會以應接轉輸及他制置事亦不少但以淮南轉運使領發運則發運一司事多壅廢此蓋其所以廢

而復置也臣比見許元為發運使時諸路有歲歉米貴則令輸錢以當年額而為之就米賤路分糴之以足年額諸路年額易辦而發運司所收錢米常以有餘或以其餘借助諸路闕乏其所制置利便多如此類要在揀擇能吏以為發運而已廢之不為便也

議曰廢都水監

臣某曰都水監亦恐不可廢今議者以謂比三司判官主領之時事日煩費日廣舉天下之役其半在於河渠

隄埽故欲廢之此臣之所未喻也朝廷以為天下水利
領於三司則三司事叢不得專意而河渠隄埽之類有
當經治而力不暇給故別置都水監此所謂修廢官也
官修則事舉事舉則雖煩何傷財費則利興利興則雖
費何害且所謂舉天下之役半在於河渠隄埽者以為
不當役而役之乎以為當役而役之乎以為不當役而
役之則但當察官吏之不才而不當廢監以為當役而
役之則役雖多是乃因置監故吏得修其職而無廢事

也何可以廢監乎且今水土之利患在置官不多而不患其冗也

議曰合三部句院

臣某曰三部句院臣未知其詳然恐由近歲三司帳籍鉤考之法大壞而不舉故三司句院有事簡處若不然則此三部句院理不可合

議曰提舉百司不當用內制但用如張師顏者

臣某曰提舉百司多用內制而今患其與三司並行指

揮庫務異同難稟臣以為唯權均體敵乃可以相檢制
事有異同則理有枉直近在闕門之外則非理皆得上
聞庫務官司亦何嫌於難稟今若只用如張師顏者一
人與三司表裏綱紀細務則恐與三司權不均體不敵
雖足以綱紀細務而三司措置百司失理莫能與之抗
議今使內制一人總其權以敵三司又使如張師顏者
一人躬親點檢細事小既足以究察諸司姦弊大又足
以檢制三司如此處置未為失也若以為費而當省則

提舉百司於內制但為兼職廢之何所省乎

議曰廢宮觀使副都監

臣某曰宮觀置使提舉都監誠為冗散然今所置但為兼職其有特置則朝廷禮當尊寵而不以職事責之者也廢與置其為利害亦不多若議冗費則宮觀之類自有可議非但置使提舉都監為可省也

議曰外則并郡縣

臣某曰中國受命至今百餘年無大兵革生齒之衆蓋

自秦漢以來莫及臣所見東南州縣大抵患在戶口衆而官少不足以治之臣嘗奉使河北疑其所置州縣太多如雄莫二州相去纔二十餘里聞如此者甚衆其民徭役固多財力彫弊恐亦因此然臣不深知其利害不敢有言

議曰詔執事之臣下逮有司俾行審官銓選之職稍稍寬假使時有簡拔

臣某曰今朝廷使監司守倅及知雜以上各以所知同

罪薦舉人材然尚患其所舉不如舉狀今若令有司行
審官銓選之職時有簡拔臣恐以一二人之耳目不足
以盡天下之材而所簡拔不足以塞士大夫之非議又
其所仕或不免交私則於時政徒有所損而已

議曰擇判司簿尉三考四考有兩紙三紙舉狀者引
對給筆札條為治目不拘文辭咸以事對命官考驗
有理趣者除縣令三考績效有聞委提刑轉運上其
實狀除京官再入兩任知縣如政績顯白與減一任

通判便除知州

臣某曰議者以為近世縣令最卑有出身三考無出身四考不問其人材如何但非贓犯則以次而授焉甚非重民安本之誼臣以為今有出身三考無出身四考皆有三人舉主乃得為縣令非不問其人材如何而特以次授也蓋近歲朝廷舉令之法最善故近歲縣令亦稍勝於往時但朝廷誘養之道未純督察之方未盡大抵人才難得非特縣令乏人今議者欲擇判司簿尉三考

四考有兩紙三紙舉狀者引對欲除以為令則與舉令之法無甚異也若欲以筆札條對求治民之材臣恐不必得治材之實但得能文辭談說者爾又以為績效有聞則提刑轉運上其實狀即除京官若令提刑轉運舉者至於五人而後與轉京官則得轉京官者少若但要提刑轉運舉狀不必五人而後轉則如此選擢之人何以知其賢於舉令而遽優異之如此又以為兩任知縣政績顯白與減一任通判便除知州不知政績如何而

可以謂之顯白若有殊尤可賞則朝廷自當選擢及有
升任指揮若不足以致選擢及升任指揮則其政績不
為甚異政績無甚異而更不用闕陞之法便減一任通
判與除知州臣恐入知州者愈冗而所除又未必賢
右臣所聞淺陋不足以知治體謹具條奏并元降雜
議封上取進止

詳定十二事議

起居舍人司馬光起請舊官九品之外別分職任差遣

為十二等以進退羣臣十二等之制宰相第一兩府第二兩制以上第三三司副使知雜御史第四三司判官轉運使第五提點刑獄第六知州第七通判第八知縣第九幕職第十令錄第十一判司簿尉第十二其餘文武職任差遣並以此比類為十二等若上等有闕則於次之中擇才以補之奉聖旨兩制詳定聞奏王珪等詳定司馬光起請難盡施行外致治之要在任官之久欲乞知州令滿三年為一任通判人緣審官院見今員多

闕少候將來差遣得行亦別取指揮知縣人今後初入者並滿六周年方入通判仍乞下審官詳定條約聞奏者臣愚以謂司馬光十二等之說王珪等既以為難行而珪等所議知州三年為一任知縣六年方入通判亦無補於官人失得之數朝廷必欲大修法度甄序人材則以至誠惻怛求治之心博延天下論議之士而與之反復必有至當之論可施於當世凡區區變更而終無補於事實者臣愚竊恐皆不足為

臨川文集卷六十二